



Jens Napātōk, Partii Naleraq  
/ maani

**Upernavimmi nunaqarfinnilu illiortiternissaq pillugu § 37 naapertorlugu  
apeqquteqaammut 2020-098-imut akissut**

26-06-2020  
Suliap nr.: 2020 - 10346  
ID nr. 54182640

Asasara Jens

Upernavimmi nunaqarfinnilu illiortiternissaq pillugu Inatsisartut Suleriaasianni § 37 naapertorlugu Upernavimmi nunaqarfinnilu illiortiternissaq pillugu Naalakkersuisunut apeqquteqarputit. Apeqqutit uannut akisassanngorlugit innersuunneqarput. Apeqqutit ataasiakkaarlugit matuma kinguliani issuarneqarput, akissuteqaat kingornanniilluni.

Postboks 909  
3900 Nuuk  
Tlf.: (+299) 34 50 00  
E-mail: [box909@nanoq.gl](mailto:box909@nanoq.gl)  
Fax: (+299) 34 63 56  
[www.naalakkersuisut.gl](http://www.naalakkersuisut.gl)

**1. Upernavimmi, Kullorsuarmi Upernaviullu eqqaani nunaqarfinni allani  
ukioppassuanngortuni inissianik illunilluunniit immikkut  
sanaartortoqarnissaanik Naalakkersuisut pilersaaruteqarpat?**

*Akissut:* 2020-imut Aningaasanut inatsimmi sumiiffinni taaneqartuni illiortiternissamut aningaasaliissutinik immikkoortsisoqanngilaq. Siunertanut aningaasaliissutit 1. januar 2017 kommuninut tunniunneqarput, ilanggullugu Nunaqarfinnut isorliunerusunullu inissialortiternermut pilersaarut, sanaqataalluni aaqqissuussinermut, illu sullivinnut/illunut tamatigoortumik atorneqartussanut aammalu kommunini illuliassanut. Tamatuma saniatigut tapersiissutitalimmik nammineq illiortiternermut aningaasaliissutit, illiorterpermut aningaasalersuinermut aaqqissuussinermut (20/20/60) kiisalu piginneqatigiilluni inissianut, tunngassuteqartut, 1. januar 2018 tunniunneqarput. Aaqqissuussinerit taakkua sumiiffinni taaneqartuni illiortiternermut atorneqarsinnaapput. Tassunga tunngatillugu paasissutissiissutigisinnaavara, Avannaata Kommunia 2017-imiilli aaqqissuussinernut assigiinngitsunut ataatsimoortumik tapiissutitigoortumik katillugit 54,8 mio. koruuninik tigusaqarsimamat.

**2. Upernaviup nunaqarfii arlallit suli illu sulliveqanngillat, aamma kommunip  
ukiuni makkunani akissaqartinngilaq, Naalakkersuisut pilersaaruteqarpat  
Kangersuatsiami Upernavimmi kujallermi, aammalu nunaqarfinni allani illu  
sulliveqanngitsuni illu sulliviit pilersinnissaannut?**

*Akissut:* Illu sullivinnik sanaartorneq nunaqarfinnut isorliunerusunullu inissialortiternermut pilersaarummi ilaatinneqarput, aamma takuuk apeqqummut nr. 1-imut akissut. Tassunga tunngatillugu paasissutissiissutigisinnaavara Avannaata Kommunia tunniussereernermeille aaqqissuussinermut tassunga ataatsimoortumik tapiissutitigoortumik katillugit 35 mio. koruuninik tigusaqarsimamat.

**3. Nunqarfiit imeqarnikkut piorsaaffiginissaannut Naalakkersuisut  
pilersaaruteqarpat?**

*Akissut:* Nunanut Allanut Nukissiuuteqarnermullu Naalakkersuisoqarfimmit akissuteqaammut ilassutissanik piniartoqarpooq, taannalu paasissutissiivoq:

"Naalakkersuisut aamma Nukissiorfiit nunatsinni illoqarfinni nunaqarfinnilu imermik pilersuinerup qulakteernissaa annertuumik aalluppaat. Naalakkersuisut Nukissiamik Imermillu pilersuinermut suliassaqarfimmut pilersaarummi 2030-ip tungaanut nunarput tamakkerlugu imermik pilersuinerup nutartereqarnissaa pillugu arlalinnik anguniagaqarput. Anguniagaq 32-immi allassimavoq, atuisartunut inuussutissarsiortunullu sapinngisamik annikinnerpaamik aningaasartuuteqarfiusumik imermik imigassamik minguitsumik naammattumik annertussusilimmik qulakteeriniarluni, Kalaallit Nunaat tamakkerlugu imermik pilersuinerup ingerlaavartumik pitsanngorsarneqarnera ingerlanneqassasoq.

Nunaqarfiit tamarmik qitiusumi maqitsisarfimmut naqitsineq atorlugu imermik pilersuiviliorqassappat, qanoq tamanna aningaasartuuteqarfiussanersoq, nukissiamik imermillu pilersuinermut suliassaqarfimmi pilersaarutip killissaasa iluanni suliassani maannakkut ingerlanneqartuni misissorneqarpoq

Nukissiorfiit paasissutissiippu nunaqarfinnut tamaginnut naqitsineq atorlugu imermik pilersuiviliorqassappat, qanoq tamanna aningaasartuuteqarfiussaasoq.  
Nukissiorfiit nunaqarfinni imermik pilersuinermut ingerlaavartumik inerisaapput, aammalu atortunik taarsertariaqalersunik taarsersuisarlutik."

Neriutigaara matuma siuliani apeqqutitit akineqarsimassasut.

Inussiarnersumik inuullaqqusillunga



Karl Frederik Danielsen